



Republika e Kosovës
Republika Kosova – Republic of Kosovo

Komuna e Prishtinës
Opština Priština –Municipality of Prishtina



Në bazë të nenit 12, paragrafi 12.2, shkronja **c**, dhe nenit 17 shkronja **r**, të Ligjit nr. 03/L-040, për vetëqeverisje lokale (“Gazeta zyrtare e Republikës së Kosovës”, nr. 28/15, qershor 2008), të dispozitave të nenit 14 të Ligjit nr. 03/L - 145, për fuqizim dhe pjesëmarrje të rinisë, të dispozitat të Udhëzimit administrativ nr. 10/2010, për punën vullnetare të të rinjve, dhe të nenit 34, paragrafi 34.1, pika **b** të Statutit të Komunës së Prishtinës, 01 nr. 110 – 391, të dt 25.02.2010, Kuvendi i Komunës së Prishtinës, në mbledhjen e mbajtur më 11.04.2013, miratoi këtë

RR E G U L L O R E
PËR FUQIZIMIN DHE PROMOVIMIN E VULLNETARIZMIT
NË KOMUNËN E PRISHTINËS

I. DISPOZITAT E PËRGJITHSHME

Qëllimi

Neni 1

Qëllimi i kësaj rregulloreje është rregullimi dhe fuqizimi i vullnetarizmit, i marrëdhënieve që krijohen midis vullnetarëve dhe subjektit juridik, organizator të vullnetarizmit për nxitjen dhe zhvillimin e vullnetarizmit në komunë.

Fusha e zbatimit

Neni 2

1. Kjo rregullore përcakton punën vullnetare të të rinjve në komunë, ku terminologjia bazë e punës vullnetare, principet dhe termat rregullohen si të drejta dhe obligime të vullnetarëve dhe të subjekteve organizatore të vullnetarizmit, kushtet për formulimin e kontratave të vullnetarizmit dhe kodeve etike, lëshimin e certifikatave të vullnetarizmit, vlerësimin me çmim për vullnetarizmin dhe garantimin e zbatimit të kësaj rregulloreje.
2. Kjo rregullore trajton të gjitha llojet e marrëdhënieve midis vullnetarëve dhe subjekteve organizatore të vullnetarizmit, gjatë kryerjes së aktiviteteve jofitimprurëse në dobi të një individi tjetër apo të publikut të gjerë.
3. Kjo rregullore zbatohet tek shërbimet dhe aktivitetet komunale, realizimi i të cilave organizohet në bazë të kësaj rregulloreje.

Përkufizime

Neni 3

1. Në këtë rregullore përkufizimet e mëposhtme kanë këto kuptime:

- a) “vullnetar” - nënkupton nocionin që është përcaktuar në ligj dhe udhëzim administrativ, gjegjësisht është një individ, i cili investon kohë, përpjekje, njohuri apo aftësi vetjake me vullnetin e tij të lirë, në shërbim të aktiviteteve dhe veprimtarive të kryera me qëllim mirëqenien e një individi tjetër apo të publikut të gjerë, që zhvillohen sipas mënyrës që parasheh kjo rregullore, pa kërkuar në shkëmbim asnjë formë shpërblimi financiar apo material për vullnetarizmin e kryer. Vullnetar mund të jetë secili individ që zotëron një aftësi për punë dhe kryen punë vullnetare në komunë.
- b) “vullnetar minoren” - vullnetar i ri, nën moshën 16 vjeç, i cili kryen punë vullnetare në komunë.
- c) “kontratë vullnetarizmi” - kontratë e lidhur me vullnet të lirë, midis subjekteve organizatore të vullnetarizmit dhe vullnetarëve, për zhvillimin e aktiviteteve apo veprimtarive jofitimprurëse në dobi të një individi tjetër apo të publikut të gjerë.
- d) “mentor” - është individi lider, i cili e bën monitorimin e punës dhe këshillimin e vullnetarit - grupit të vullnetarëve.

2. Përveç përkufizimeve të përcaktuara me këtë rregullore, do të përdoren edhe përkufizimet e cekura në Udhëzimin administrativ për punën vullnetare të të rinjve.

Përfitimet e Komunës nga puna vullnetare

Neni 4

1. Nxiti qytetarin aktiv;
2. Ndhmon Komunën në realizimin e projekteve në interes publik;
3. Promovon dhe fuqizon vlerat e të rinjve në Komunë;
4. Përmirëson mirëqenien e qytetarëve;
5. Forcon bashkëpunimin dhe besimin në mes të qytetarëve dhe Komunës;
6. Ndhmon Komunën në realizimin e interesave të tjera për Komunën;
7. Ndhmon Komunën në afirmimin e saj në procesin e integritetit dhe
8. Ndhmon integritetin e të rinjve brenda komuniteteve.

Promovimi

Neni 5

1. Vullnetarizmi njihet dhe promovohet si një aktivitet i një interesi të veçantë për Komunën, për aq sa përmirëson cilësinë e jetës, stimulon pjesëmarrjen aktive të qytetarëve në jetën shoqërore dhe kontribuon në zhvillimin e një shoqërie të barabartë, humane dhe demokratike.

2. Roli i vullnetarizmit dhe rëndësia e tij duhet të përcillen tek fëmijët dhe të rinjtë, nëpërmjet aktiviteteve jashtarsimore në shkollimin e ulët dhe të mesëm. Kjo duhet të përcillet me aktivitete praktik, duke i angazhuar nxënësit në punë të dobishme shoqërore.

Aktivitetet që nuk trajtohen si punë vullnetare

Neni 6

Sipas kësaj rregulloreje, aktivitetet e poshtëshënuar nuk konsiderohen vullnetarizëm:

- a) kryerja e aktiviteteve vullnetare ose ofrimi i shërbimeve që nuk janë në përputhje me ligjin dhe aktet tjera nënligjore;
- b) zhvillimi i aktiviteteve ose ofrimi i shërbimeve kundrejt përfitimit financiar apo material të parregulluar me kontrata të rregullta sipas Ligjit të punës;
- c) kryerja e punëve pa shpërblim, natyra e së cilave i përket një marrëdhënie punësimi, e cila rregullohet me Ligjin e punës;
- d) kryerja e punëve ose ofrimi i shërbimeve që njëra palë është e detyruar t'i kryejë për palë të treta, siç përcaktohet me ligj apo akte nënligjore;
- e) përmbushja e detyrimeve dhe kryerja e aktiviteteve që një individ është i obliguar t'i zhvillojë për një palë të tretë të përcaktuar me ligj apo rregullore tjera;
- f) zbatimi i detyrimeve të veçanta në përputhje me vendim gjykate;
- g) kryerja e veprimtarive ose shërbimeve që janë për përfitim të rrethit familjar apo miqësore;

Neni 7

Puna vullnetare në komunë bëhet për interes publik.

Trajtimi i vullnetarëve

Neni 8

1. Organizatori i punës vullnetare në Komunë është i detyruar t'i trajtojë vullnetarët në bazë të parimit të mundësive të barabarta për të gjithë, pavarësisht moshës, racës, gjuhës, fesë, gjinisë, bindjeve politike apo besimit, përkatësisë nacionale apo sociale, gjendjes financiare, arsimit, pozitës shoqërore, gjendjes civile, përgjegjësive familjare, apo anëtarësimit ose mos anëtarësimit në një parti etj., aftësive fizike ose mendore, sëmundjeve etj.
2. Aktivitetet lidhur me punët vullnetare që i zhvillojnë partitë politike, nuk trajtohen me këtë rregullore.

Zyrtari komunal për rini dhe mentori

Neni 9

Zyrtari komunal për rini është përgjegjës:

- a) të mbajë regjistrin e vullnetarëve, të pranuar nga organizatori i punës vullnetare;
- b) t'i përcjellë regjistrat e vullnetarëve në nivel qendror – Departamentin e Rinisë;
- c) të pranojë kërkesat nga organizuesit e punës vullnetare për pajisje me librezë vullnetare;
- d) të shqyrtojë kërkesat dhe dokumentacionin tjetër përkatës dhe vendos për lëshimin librezave për secilin vullnetar të paraqitur;
- e) të përcjellë ndryshimet eventuale në statusin dhe marrëveshjen e vullnetarit dhe kujdeset që këto ndryshime të jenë në pajtim me këtë rregullore dhe ligj;
- f) të bëjë verifikimin e të dhënave në librezat të pranuar nga organizatori pas përfundimit të punës vullnetare, lidhur me plotësimin e tyre në përputhje me udhëzimet ligjore dhe marrëveshjen në mes organizuesit të punës vullnetare dhe vullnetarit;
- g) të bëjë vërtetimin e librezave, duke i vulosur;
- h) të kryej edhe punë të tjera që lidhen me aktivitetin e punës vullnetare në komunë, e që nuk bie ndesh me ligjin dhe aktet tjera nënligjore.

Neni 10

Mentori është përgjegjës:

- a) për koordinimin e punëve, bashkë me vullnetarin - vullnetarët;
- b) për përcaktimin e objektivave të aktivitetit për zhvillimin e punës vullnetare;
- c) për monitorimin e punës dhe këshillimin e vullnetarit – grupit të vullnetarëve;
- d) harton raport për zhvillimin e punës nga ana e vullnetarit, ku përfshinë orët vullnetare të mbajtura, sfidat gjatë kryerjes së punës vullnetare, trajnimet që janë propozuar në mes vullnetarit dhe mentorit, efektet e arritura, të cilat do të maten nga performanca në punë dhe aftësitë e veçanta që janë treguar nga vullnetari;
- e) kryen edhe detyrat të tjera të përcaktuara me ligj dhe akte nënligjore.

Neni 11

1. Kriteret dhe kushtet që duhet t'i plotësojë një mentor, duhet t'i caktojë organizuesi i punës vullnetare.
2. Mentori duhet të ketë vlera morale dhe përvojë relevante.

Obligimet e vullnetarëve

Neni 12

Obligimet e vullnetarëve janë të përcaktuara me udhëzim administrativ.

Lidhja e marrëveshjes për punë vullnetare

Neni 13

Lidhja e marrëveshjes për punë vullnetare bëhet në pajtim me udhëzim administrativ.

Kompensimi i dëmit

Neni 14

Kompensimi i dëmit caktohet në pajtim me dispozitat ligjore dhe aktet nënligjore që e rregullojnë këtë fushë.

Përfundimi i punës vullnetare

Neni 15

Përfundimi i punës vullnetare bëhet në pajtim me dispozitat ligjore dhe aktet nënligjore që e rregullojnë këtë fushë.

Motivimi i vullnetarëve:

Neni 16

1. Përparësi në shërbimet publike komunale;
2. Përparësi në pjesëmarrje në trajnime;
3. Ndarja e shpërblimeve për punën vullnetare;
4. Promovimi i rezultateve nga puna vullnetare në mjetet publike për publikim (ueb-faqe, gazeta, revista, fletëpalosje etj.);
5. Organizimi i aktiviteteve kulturore për vullnetarë;
6. Përfshirja e vullnetarëve në organizimin e aktiviteteve kulturore të organizuar nga Komuna;
7. Ofrimi i mundësive për kryerjen e punës praktike në institucionet publike - administratë komunale;
8. Organizimi i fushatës promovuese të vullnetarizmit.

Integrimi i punës vullnetare brenda planit të veprimit

Neni 17

Aktivitetet e punës vullnetare duhet të jenë pjesë e planit të punës, planit të veprimit dhe çdo dokumenti tjetër të drejtorisë përgjegjëse për rini.

Neni 18

Vullnetarizmi brenda Këshillit të veprimit rinor lokal (KVRL) dhe qendrave rinore. Aktivitetet e kryera, ose shërbimet e ofruara nga KVRL dhe qendrat rinore që veprojnë brenda Komunës, parim kryesor do ta kenë punën vullnetare, përmes së cilës bëjnë ngritjen e vetëdijes për punë vullnetare të anëtarëve të saj.

Baza e të dhënave

Neni 19

Zyrtari rinor i ndihmuar nga KVRL dhe Qendra rinore, ka obligim që të mbajë bazën e të dhënave, me qëllim të monitorimit të punës vullnetare;

Buxheti

Neni 20

Aktivitetet e punës vullnetare duhet të jenë pjesë e planifikimeve buxhetore komunale;

Puna vullnetare gjatë procesit mësimor

Neni 21

Nxënësit nuk mund t'i përcjellin aktivitetet e punës vullnetare gjatë procesit mësimor.

Zbatimi

Neni 22

Për zbatimin e kësaj rregulloreje kujdeset Kryetari i Komunës së Prishtinës dhe drejtoria kompetente për rini.

II. DISPOZITAT PËRFUNDIMTARE

Neni 23

Aspektet e vullnetarizmit të rregulluara me këtë rregullore, si dhe marrëdhëniet që lindin nga kontrata e vullnetarizmit që nuk janë të përcaktuara me këtë rregullore, janë objekt i dispozitave të përgjithshme ligjore.

Neni 24

Kjo rregullore hyn në fuqi 8 ditë nga dita e publikimit të saj në tabelën e shpalljeve dhe në ueb-faqen e Komunës së Prishtinës.

KUVENDI I KOMUNËS SË PRISHTINËS

01. nr. 110-50569, më 11.04.2013

**KRYESUESI I KUVENDIT TË KOMUNËS
Sami Hamiti, ecc. i dipl.**